

●大南高僧傳〔續二〕

○定香長老

天德府蕉山感應寺定香長老。朱明人也。姓呂氏。世修淨行。弱歲師事建初多寶禪師。逾二十四年。寶門徒百餘。唯師深得其奧。一日問寶曰。如何見得真心。寶云。是汝自發。師豁然領旨。語云。一切皆然。非唯某甲。寶云。汝了也。未。師云。弟子了時還同不了。寶云。須以此保任。師掩耳背立。寶便喝去。師禮寶云。汝後還似一箇聾瞞接人否。都將城隍使阮郇欽其名德。延就此寺居焉。學徒雲集。教人演化功不爲少。李太宗崇興大寶三年庚寅三月三日疾會衆決別。說偈云。本來無處所。處所是真宗。真宗如是幻幻有。卽空空偈畢奄然而化。

▲禪老禪師

仙遊天福峯重明寺禪老禪師。初參建初寺多寶禪師。領得心要。尋就慈山卓錫禪風。日振學者千數。鬱爲叢林之盛。通瑞年間。李太宗嘗幸其寺。問師云。和尚住山來幾時。對曰。但知今日月。誰識舊春秋。帝云。日過作麼生。事對曰。翠竹黃花。非外境。白雲明月。露全真。帝云。有何意旨。對曰。辭多無後益。帝豁然有得。將遣使迎師赴闕。顧問而師先已歸寂。帝深悼惜。御製詩哀挽。勅中使厚齋贈禮。結壇閣。維收靈骨塔于山門。又廣修其寺。置徒以香火焉。

○圓照禪師

昇龍京吉祥寺圓照禪師。姓梅氏。諱直。龍潭人。李太后兒子也。幼聰敏好學。聞本郡密嚴寺長老善相。試就決焉。長老熟視曰。汝於佛法有緣。若出家必爲善菩薩中人。不然則壽夭難保矣。師感悟辭

親投邑蕉山寺定香授業執侍餘年研究禪學常持圓覺經明三觀法一夕定中見文殊菩薩持刀破腹洗腸傳之以藥自是心中所習宛如夙契深得言語三昧講說如流尋於京畿之左創寺居焉學者林萃有僧問佛之與聖真義云何師云籬下重陽菊枝頭淑氣鶯進云謝學人不會請再指示師云畫則今烏照夜來玉兔明僧又問已獲師真旨玄機示若何師云不慎水盤擎滿去一遭蹉跌悔何之進云謝師指云莫濯江波溺親來却自沉又問少室摩竭最玄自古于今誰繼將爲主師云幽明乾象因烏兔屈曲坤維爲嶽淮又問如何是大道根源一路行師云高岸疾風知勁草邦家板蕩識忠良又問一切衆生從何而來百年之後從何而去師云盲龜穿石壁跛鼈上高山又問青青翠竹是真如如何是真如用師云贈君千里遠笑把一瓶茶進云恁麼卽空來何益師云誰識東阿去途中戴白頭又問野軒一深戶誰識等閑敲師云金谷蕭疎花草亂而今昏曉任牛羊進云爲什麼如此師云富貴兼驕泰翻令敗市樓又問龍女獻珠成佛果檀榔捨施福如河師云萬古月中桂扶疎在一輪進云恁麼卽勞而無功師云天上如懸鏡人間處處通又問渡河須用筏到岸不須船不渡時如何師云涸池魚在陸獲活萬年春進云恁麼卽隨流始獲妙理師云見說荆軻侶一行竟不迴又問金黃混交元一氣請師方便鍊情形師云不是齊君客方知海大魚進云郭君若不納諫語亦奚爲師云若欲先提飲休爲巧畫蛇又問蛇死於路請師救活師云汝是何方人僧曰本來山人師云速回舊岩隱莫見許真君又問海藏滔滔應不問曹溪滴滴是如何師云風前松下凄涼韻雨後途中淺濁泥進云恁麼卽不異今時也師云籬下重陽菊枝頭暖日鶯又問昭昭心目之間朗朗色身之內而理不可分相不可覩爲什麼不覩師云苑中花爛漫岸上草離披進云歲寒羣品落

何以可宣揚。師云。喜君來自達。不亦旦歡娛。進云。幸聞今日訣。從此免忽無。師云。淺溺纔提出。回頭萬丈潭。又問。涅槃城內尚猶危。如何是不危之處。師云。營巢簾幙上。鬢髮葦苕莖。進云。若遭時迫近。兩據是何爲。師云。丈夫隨放蕩。風月且逍遙。又問。一切衆生皆言是佛。此理未明。請師垂示。師云。勸君旦務農桑去。莫學他人待勉勞。進云。幸蒙師顯決。終不向他求。師云。可憐遭一疇。饑坐却忘飧。又問。幾年久積囊中寶。今日當場覲面看。師云。祇待中秋月。却遭雲雨侵。進云。雖闡師語說。此理未分明。師云。笑他徒抱性。溺死向中流。又問。如何是一法。師云。不見春生兼夏長。又逢秋熟及冬藏。進云。恁麼卽成佛多也。師云。祖龍驅且止。徐福遠徒勞。又問。見性成佛。其義云何。師曰。枯木逢春花競發。風吹千里馥神香。進云。學人不會。願師再指。師曰。萬年茄子樹。蒼翠聳雲端。師嘗撰藥師十二願文。李仁宗皇帝以其稿附使達于哲宗。召至相國寺。高座法師覽之。合掌禮曰。南方有肉身大士出世。善說經法。師云。貧道豈能敢增損。因再述一本。附還使回以聞。帝深嘉獎。廣祐六年庚午九月日無疾而逝。壽九十二。有讚圓覺經。十二菩薩行修證道場及參徒顯決一卷行世。

●究旨禪師

安朗龍墜山延齡寺究旨禪師。宋明扶潭人也。姓譚氏。少好學魯竺之書。無不該貫。一日撫卷嘆曰。孔墨執有老莊。若無世俗之典。非解脫法。惟有佛教。不許有無。可了生死。然修持戒精進。求善智識。印證始得。因捨俗詣邑山感應寺。定香長老受具參請。曰。問如何是究竟義耶。師云。未。山曰。我與汝究竟義了。師擬議。山云。蹉過了也。師於言下究旨。因以名焉。尋入仙遊山光明寺。頭陀苦行。終年足

不下山演化之聲。升聞于上。李太宗皇帝累徵不就。凡三幸其寺。以慰問焉。太師梁公文任亦加敬禮。龍瑞太平年間。宰相楊公道嘉以其寺請師住持。固辭不獲。從之下山日。語人曰。吾不復到此山中。禽獸悲鳴。三旬不止。居甫三年。以彰聖嘉慶某年月日。將示寂。會門徒謂曰。夫一切法門。本從汝性。一切法性。本從汝心。心法一如。本無二法。牽纏煩惱。一切皆空。罪福是非。一切皆幻。無所非果。非因。不於業中分別。業若有分別。不得自在。雖見一切法。而無所見。雖知一切法。而無所知。知一切法。因緣爲本。見一切法。正真爲宗。雖染實際。了解世間。皆如變化。明達衆生。惟是一法。無有二法。不捨棄境。善巧方便。於有爲界。示有爲法。而無分別。無爲之相。蓋欲絕我妄念。計較故也。乃說偈云。覺了身心。本凝寂。神通變化。現諸相。有爲無爲。從此出河沙。世界不可量。雖然徧滿虛空界。一一觀來。汲形狀。千古萬古難此。况界處處常朗朗。是日午結壇闔維。收其靈骨起塔。

▲寶性明心二禪師

天德府邑山感應寺寶性明心二禪師。並朱明人性嚴氏。心范氏。早歲共幼出家。爲同志友。初與圓照禪師俱事定香上人。深得其髓。後各佩心印。隨方開化。傑爲叢林之首。照常有歌詩遺寶。美其高志。具在集中。茲不繁錄。二師居常持誦法花爲業。踰十五載。未常少置。每至藥王品。輒流涕相謂曰。菩薩因此累劫薰修。於大乘心。猶能發大勇猛精進。不惜身命。况我等輩。於末法中。初心發人。若不如是至誠。則於大菩提真大乘心。何可希覬。以天成七年四月二師將焚身。得請于朝。遂建講經會。同入火光三昧。其餘骸遺骨。俱成七寶。有詔留長聖寺供養。李太宗以其靈異。改元通瑞。〔未完〕

● 阮長祚先生遺草〔續編〕

★學習儲才陳請摺

卑竊見幾年來朝廷急於自彊。多行廣開言路。設新題目。使國內一才不棄。一善無遺。其用心可謂勤且切矣。除科舉應制外。未曾見有別科應命。以副朝廷之望者。誠以養之未豫也。卑於前日已有國位爲貴官位爲重一摺。乃其大根大本。國內福善皆由此出。誠爲古今升降人我盛衰之大關鍵。卑之學術本領。拏定在此。今又將學習儲才一摺稟明。誠富強之一大條路。就中言語似乎棄舊謀新。尊人抑己。然罵佛方是愛佛。能俯透卑之一片苦情者。萬賴寬恕。竊惟仁義道德乃人之本性。雖如蠻貊者亦不能捨此。以存其國爲盜賊者亦不能外。聖智以服其儕。然而談仁義者往往利令智昏。無非是無才藝以自養所學。故見利忘義。欲勝理亡。昔人云。倉庫寔而後知禮節。衣食足而後知榮辱。若爲貧所驅。將救死而且不遑。奚暇治禮義哉。故孟子言仁依於常產。孔子言信先以足食。究其深意而觀。則富先於教藝。居其成。蓋能明其才藝者。方能深曉人物之理。而養道德之根。故誠正修齊之功。必在於格物致知之後。而格致工夫。由於學習。昔人云。一物不知。儒者所恥。而不云一字不知者。誠以天地人我皆物也。古人明求道之法。則云近取諸身。遠取諸物。是學身物才藝者。卽所以明道也。人生德業基於少。是以古人初學而教之以六藝。到據德依仁之後。而又曰游藝。是藝爲之始終也。古之所謂大聖者。以其能開物成務。羲農黃帝創始器用。迨至堯舜之叙工修府。大禹之治水。作貢湯武之征伐。開基周公之制作。集成太公之九府。利用那辰。未聞以文章名也。三代以下爲之君者。如五伯。以及秦漢隋唐宋元明。其創業開拓者。未嘗以文學名。爲之將相者。如管仲之內

政先軫之能兵。蘇張之縱橫。蕭曹之少文。以及張良鄧禹孔明房杜郭子儀等輩。亦未嘗以章句名也。周之獮。猶漢之匈奴。唐之突厥。凡諸北狄西戎。那辰其強盛於中國。而不能憑陵久割者。以其時多有茂才異藝之人。爲之用也。今觀其兵書律曆方藥器藝各書。皆自唐以前五帝以後傳來。亦可想其當時之專門何如也。迨後宋明專於文學。委弱不振。以致元清迭而據之。雖或運會使然而亦少異才者。爲之藩蔽也。西方亦然。當漢唐宋之世。落瑪爲一統之朝。其武功振乎四海。威靈掩乎四方。有多奇異制作。流傳至今。自中葉而後。守成者以宴安爲務。仕進者以文詞爲梯。一時君子迭出。以絕品詞翰。著書立論。以自高異。而漸棄寔學。以至西北諸胡。摧破之而散爲列國。至今西人懲羹脫舌。故其取士絕無文章之一科。除中國日本高麗與我國外。各國亦無有以文章取才。誠亦以賦詩不能退虜于言。殊無一策。故變之而以造化行事爲學。蓋造物乃是萬民之大師父。凡施之行事。皆是寔用。如時行物。生氣升水降。天上之日月星辰。空際之風雲雨露。地上之飛潛動植。人類之運動經營。凡目所見生化者。皆是寔物。爲造物之人子者。是我們而不法其垂象至教。不習其形下式樣。不學其權力巧妙。不肖其經緯運度。不治其山海寶藏。不用其賦與貴性。凡造物所生之才質氣力。所遺之永遠基業。俱付于空言無用之文辭。不思作成其所遺。善用其所賜。到事勢迫時。則始仰天嘆曰。天何貧寢我也。豈不辱及造物乎。是以學習才藝乃是性肖造物之式度。如古人見轉蓬以爲車。法月弦以爲弓。取物象以制字。聞風範以聽音。法星形以制器。審地勢以營立。凡範圍曲成者。殆皆類此。西方現今凡諸奇器。無不因其天物自然之力以爲之。故重學家云。最大器機其妙與野蠻以一木治田同。但人不察耳。故凡其所習皆學造化之所教。凡其所知。皆是曉造化之所形。凡其

所行。皆是因造物之所造。凡其所得。皆是享造化之所遺。此所謂以人成天也。夫天下之事。從來未有不思而得。不學而能。雖聖人亦學之不厭。况常人乎。學寔事則有寔用。學裂滅則報裂滅。植豆得豆。理之當然。誰有能反其道者。故凡我人要以自己之學。而自標榜以爲榮。則其所得口頭推讓禮數之榮。亦云美報。其吃著咬嚼者。亦文字而已矣。何能盡用天地之妙乎。西人亦人耳。彼豈能外天地以爲學。何以所得功效。如卑卑所稟君位官位之詞者。皆由彼能以造化之寔事爲學。故冥冥之中默啓其衷。以成天地之妙用。以贊造化之不及。我國非造國之民乎。何以如是其卑也。卑之所稟。非是要去其舊而謀其新。但要以我固有之善法。又兼天下新創之善法。則天下之新有者。我亦同有。而我之原有者。天下所無。以二智敵一智。如六利詞中段所稟者。如此。則誰敢侮予乎。茲請或者朝廷設出許多題目。交出所在地方官遍問。不拘良道。有能做出寔理寔事者。依題作文投納。每月以各卷總遞上京一次。以俟考閱。不論何卷有裨于急用者。量行薄賞示勸。再飭該名依卷施行。如符其言。而有益于經國公用者。依科擢用。如有益于民間私用者。則發憑使得自造發兌。若地方官而有彼此岐視淹隱卷文者。許得上京投訴。所有題目計後。

一請凡國學省學私學各堂。並課覈鄉會諸試文者。俱以時文爲重。如律曆兵權工刑吏禮諸政事。俱得直言無隱。有何弊竇。有何善法。何因何革。諸當今之急者。有能剖晰精微。歸于寔確宜辰者。方能中格。而以古文爲次。

一請海利諸科。有能新設鹽政。並罟網船隻。筌叢諸攻魚畜魚醃魚等法。善于舊法者。量予賞格。一請山利一科。有能尋得新鑛。如五金之類。並思出如何尋法。如何試鍊法。如何掘採法。又設出如

何妙法。以獵犀象。以尋寶貝。以治木材。並諸林利。又依自己所近地方。有能畫盡深山大谷高原形勢。量其遠近廣狹高深。要審一一註明不差遞納。以上並隨其利之大小。量行賞賜。

一請地利一科。凡有何荒閑處。不拘山林或海面墳起。或江隈堆積。或湖澤沮淤。一面有能設巧法。以開破培築。可防後患。一面有能相其地宜。試行栽植。如桑麻穀豆之類。秀過常格者。亦隨利行賞。

一請水利一科。乃利之最大者。有能設新法。或浚渠或築堤。或畜水以防旱。或引水以通淤。或取遠水以灌田。或尋深脉以資渴。如試用已驗。而其法可傳者。大加賞賜。以酬其功。如四宣常被水害。有能設法永除其患。當急用以利民。

一請凡日用常行諸器皿。有能精思造法。因舊生新。其便利平價過於常物者。

一請凡諸飲食各物。有能以常用之物。設法添多。或久不陳腐。或味美於前。或尋得何物。未經食用。而能食用者。如救荒之類。

一請凡諸藥味。我國最多。且其氣與我人性相宜。有能取其何味。同中土者。精試製法。與北味同。並能取俗傳諸味。並蠻民所用各味。一二栽植製造等法。不論多少。當堂試驗的確。編入本草頒行。以上器皿與飲食藥味三者。俱別加賞給。別使取利。以酬其勞。

一請凡有經過外國。而能取其土產。擇其與我相宜者。歸植確有發生得利者。與賞藥味同。

一請凡民間商戶。有能合夥行商。其本錢至百萬者。現有確寔大加賞賜。有能合夥。或一家而造得大船。或買來亦聽。不論何式樣。往大清或外國行商者。亦賞。

一請民間有能結會相救者。如救火之類。或商船失事賠還之類。或浚港取稅之類。或代國家修築橋梁道路屋宇之類。或出錢與國家相借。而遞年取利之類。或捐錢與國家設立孤獨貧病各屋。並

自願捨身管事者。或國家有急之時。能借錢至一萬以上者。俱量其功其事之大小。而分別爵品。或旌賞。或扁額。

一請不拘何人。有能私淑外國言語。如葩牙英吉利爲二項。瓜哇中國爲三項。西邊近我諸芒牢者爲四項。富浪沙爲一項。考核確的。俱以行人秀才之名。名之量行饒役。或幾年。或滿代。有能精通西方各樣機器的書。而有益于寔用者。依字譯出。依圖畫來。或一部。二部。三部不限。俱要以一千紙爲準。由部遞納與西帥相閱。不差。卽以在家予之。

一請於京城內外諸公土。有何富戶。能出家財設立瓦屋。租人居住。其茅屋盡行撤去。隨其多少賜賞其租銀十分歸公需之。二這款有多諱忌。有多利害。朝廷亦已深曉。卑不敢叙

一請諸育嬰院。教幼院。是道教中之枝葉。西方各國處處有之。今我若能開設寫書與西方國準各會得來救濟。文王仁政此居其先。而我方阻於多大事。未能一一舉行。而捨身服事之人亦難其選。夫廢棄一人。是損國中之一分。今有養教之使得。全其生成其性。不愈於幾級浮圖乎。卽如育嬰院有以西字西藝爲教。有以南字南藝爲教。並行不悖。男女一皆入學。以至成人。其他會亦皆類此。朝廷是民庶之父母。凡有益于兒子。而勢有可取者。不論遠近彼此。俱設法取之歸家。爲是。或者可準於每省立每院。而以鑒牧管之。卑請料辨育嬰堂者。有益于幼童者大矣。向上各條。是卑擇其尋常事件而易行者。以引出後來許多大作用。這是撮其題綱之大者。就中諸小目小起出題。未能一一枚舉。紙未能盡寫就是五六百。若朝廷要出何題。卑再行逐條開明。卽如時文諸政事一款。已最繁多。而其可以漸變移者。此條爲急爲重存。如諸大工夫諸大機巧。後亦徐徐舉行一二。以爲民之倡率。大凡下之好惡。就由於上之賞罰勸懲。不以東西岐而異其性也。民之所爭向惟在上之所貴者。何在耳。今我之

所貴者儒。而儒之所貴者以其多文也。若以學多文之堅工。而兼行造物有萬不同之富貴。則其所得貴者亦多。蓋物以羣分。每每有一奇妙可貴。所謂物物有一太極者也。若分門別類而學之。則一國而有多可貴。不愈於獨一貴乎。夫人之性情不同。各有所長。以應物。今我用其一長。則凡偏於他長者。有何盼望而力行之乎。總而觀之。西方隨人之性資。以法造化之多般寔事。而以所得怡養其性情。以歸于道德。故民亦多有所成就。以應百度。我則惟貴一士。故民亦以士報之也。今若使民明知朝廷兼以多藝爲貴。則不數年之間。而爭以多藝獻于闕下矣。謹稟。

協辦大學士領兵部尙書充機密院大臣掌欽天監事務兼管商舶大人

刑部尙書兼禮部尙書大人

吏部尙書兼工部尙書大人

戶部尙書大人

曠燭

嗣德二十四年九月 日

◎筆墨餘痕

△三懶漢

昔有一國王生三子。並愛之。略無差別。不知升遐之後。將傳國於誰。一日呼三子前謂曰。吾親愛之兒乎。吾今欲得天下第一懶漢。以爲嗣王。蓋國中萬事已各有人代爲之。嗣王若有所爲。則禍國者不淺也。不知爾三人中孰爲最懶者。長子曰。然則國爲兒有矣。吾懶甚。譬如臨睡之時。有物入吾目。至於兩曉不能閉。而吾酣睡如故也。次子曰。吾父國爲兒有矣。吾尤懶甚。吾嘗坐爐旁以取煖。俄而火大熾。兩趾皆焚。而吾不走避。蓋不願有一舉足之勞也。三子曰。吾父國當兒有矣。蓋吾之懶雖有一繩縊吾頸。勢將垂斃。一人以利刀授於吾手。使割之。吾寧就縊而不願一舉手以爲之也。父喜曰。吾不意三兒善懶若此。大佳大佳。皆可以爲我國嗣王矣。